

Tupa avatangiisinillu tupatorfiunngitsunik isumannaarineq kiisalu tupanik nioqqutissat nalunaaqutserneqartarneri pillugit inatsisartut peqqussutaata allangortinneqarnissaa pillugu Inatsisartut peqqussutissaattut siunnersuut (Pujortartarneq pillugu inatsisip malitsigisaata kinguneranik allannguut)

(Naalakkersuisut)

Saqqummiussissut

(Peqqissutsimut Naalakkersuisoq, Agathe Fontain)

Siullermeerneqarnera

Naalakkersuisut sinnerlugit matumuuna saqqummiunniarpara tupa avatangiisinillu tupatorfiunngitsunik isumannaarineq kiisalu tupanik nioqqutissat nalunaaqutserneqartarneri pillugit Inatsisartut peqqussutaata allangortinneqarnissaa pillugu Inatsisartut peqqussutissaattut siunnersuut.

Naalakkersuisut pujortaqqusinnginneq pillugu Inatsisartut inatsisissaatut siunnersuummik UPA2010-mut saqqummiussipput. Illup iluani nalinginnaasumik pujortaqqusinnginneq illullu iluani pujortartarfimmik pilersitsisinnaanerup kiisalu illup iluani pujortarsinnaanermut ilaannikkuinnaq akuersissuteqartarnerup atorunnaarsinneqarneri siunnersuutikkut piviusunngortinneqassapput.

Tupa avatangiisinillu tupatorfiunngitsunik isumannaarineq, kiisalu tupanik nioqqutissat nalunaaqutserneqartarneri pillugit maannakkut inatsisartut peqqussutaanni avatangiisit tupatorfiunngitsut pillugit aalajangersakkat taamaalilluni illup iluani pujortaqqusinnginnermik taarserneqassapput.

Pujortaqqusinnginneq pillugu Inatsisartut inatsisissaattut siunnersuutip saqqummiunneqartup maannakkut siunnersuutigineqartoq kinguneraa.

Siunnersuutip peqqussutip taaguutaa allangortippaa avatangiisillu tupatorfiunngitsut pillugit aalajangersakkat atorunnaarsillugit. Peqqussummi tupa pillugu aalajangersakkat allat, tupanik nioqqutissanik nioqquteqarneq, tupanik nioqqutissanik nalunaaqutsersuineq, tupanik nioqqutissat pilerisaarutigineqarneri aamma aalajangersakkanik unioqqutitsinernut pineqaatissiisarnerit allannguuteqaratik ingerlaqqipput.

Taamatut oqaaseqarlunga matumuuna siunnersuutip Inatsisartuni akuersaarlugu suliarineqarnissaanut tunniuppara.